

摘藻堂四庫全書薈要

集部

欽定四庫全書薈要

集部

道園遺稿卷二



臣董誥詳校

詳校官助教臣謝登雋

欽定四庫全書薈要

道園遺稿

提要



臣等謹案道園遺稿六卷元虞集撰集平生所為文凡萬餘篇門人李本編為道園學古錄五十卷有劉基所刻大字本又有烏克章所刻建寧本後又編其詩文曰道園類稿與學古錄互有出入此遺稿一編則其從孫堪

補輯也凡古律詩七百四十一篇附以樂府
刻於至正十四年其中有類橐已載者百餘
篇而類橐所無者尚五百餘篇集之詩文為
有元一代冠冕而橐多散佚當李本編學古
錄時已有泰山一豪芒之歎堪續加蒐訪用
心甚勤雖不能搜括無遺然掛漏者亦已少
矣又考黃潛後序以學古錄為集所手定而
書前有至正己亥眉山楊椿序以為集季子

翁歸及其門人所編與李本序合蓋集母楊氏為衡陽守楊文仲之女楊椿即其外家後人其言自當無誤亦可證黃潛所云之不足據虞堪字克用一字勝伯隱居長洲明洪武中嘗為雲南府學教授好學有文所著有鼓枻稿已別著錄云乾隆四十二年四月恭校上

總纂官

臣紀昀

臣陸錫熊

臣孫士毅

總校官臣陸費墀

道國遺稿原序

故奎章閣侍書學士蜀郡虞公道園學古錄其季子翁
歸與公門人之所編今建寧板行者是也書始一出如
景星鳳皇士爭先覩之為快而湖海好事者復輯公詩
另為一編然與學古錄所載時有得失予意其蒐輯已
無遺憾近於一二士友間每見公詩文皆公所親筆較
之二集中多不載然後知公之篇章在世不能無遺佚
者予外侄克用公之諸孫也好古嗜學蚤夜不倦聞士

友間有公詩文輒手編成帙如是者累年積其所有凡七百餘篇皆板行二集所無者遂分編次為六卷附以樂府題曰道園遺稿屢欲刊之而未能也近克用假館于吳江之金君伯祥家伯祥之先君子樂善公至治間嘗識公于吳盖平日之所欣慕而樂道之者克用偶出是編伯祥亟命鈔諸梓觀其所好可以知其為人矣噫昔虞公南來予以總角獲拜公于錢唐時予從叔祖家母氏博涉書史嘗手書蓮經一部一日出以示公公不

勝渭陽寒泉之思至賦七言古詩辭極淒愴且手跋於
後者垂數百言今二集既不錄而予又不能追憶以附
克用集中可勝嘆哉然觀克用所編凡公平日之雄辭健
句膾炙人口者已悉收入則其所遺者僅一二而克用
之用心尚未已也予嘉克用之用心伯祥之好事且因
其請而為識於篇端云至正己亥夏五望眉山後學楊
椿序

欽定四庫全書薈要卷一萬六千三百七十八

集部

道園遺稿卷一

元 虞集 撰

操

釣雪操

鑿方池兮山之曲仰喬松兮倚修竹四時來兮無不足
歲之寒兮天雨玉雨玉兮滿庭予何思兮折芳馨魚潛
淵兮亦在藻言將求之以忘老鰈鰕兮鯉鯉有酒兮多

旨霏霏兮來思上友兮君子

古詩四言

致樂堂詩

致樂堂者集賢待制周君之所以奉母者也
蜀郡虞集為之賦詩曰

翼翼新堂有閭有房夫人來居既安既舒既好既寧載
燠載清言闔于門以寫我誠有齊其馬有仇其軒為子
來者允貴且賢貴容舒遲賢有令儀爾因爾宗先君之

思翕爾兄弟具于嘉旨我飲我食先君之子詩言溫柔
禮言著存我撫我惠先君之孫樂哉誰氏維周壽母疇
克致茲周南仲子君子善頌文則多有又永歌之以導
燕喜

萬戶張公廟堂詩

并序

大德辛丑昭勇大將軍河南征行萬戶鎮通
州張公以其兵從征緬死之通人作廟以祀
公三十年間朝之公卿大夫士能為文章者

莫不為之有所製作泰定丁卯公子御史亦
俾予賦之集以為征緬事始末在朝諸君子
則知之矣通州僻在江海之際其人何自知
之況久遠乎且不著夫狂夫首禍之故成宗
皇帝聖明卒致其罪則公所以不肯墮其構
陷必甲冑以死之意亦終不白于通人之將
來也故稍原其始而道之庶其有考也詩曰
於赫世皇並用豪傑一定宇內橐厥戈甲既久既安成

宗繼之祖功莫加道在守持狂夫興謀以動相國曰昔
祖宗咸尚戰克萬方悉來史皆前能我獨無名曷稱繼
承蠢彼西南翳叢負固聚落八百各統女婦人強善驕
馬具競豪豢豕于牢黃金飾槽取而有之富可足用赫
乎功多以世智勇相臣以聞天子曰嘻有是言哉汝其
試之狂謀既售諫言不入既賦軍實弓鉞仍戢餽饌啟
行萬里騷然飢危蹈毒未戰已捐番番名將天子爪士
鎮于江滸天子所使狂夫忌之承制驅之詎思國謀徒

逞厥私將軍慨言死我臣職可陷者身不陷吾直見制
鄙庸豈我召兇心知無還况冀立功與其矯誣死彼狂
手孰與奮擊不喪吾守孤旅轉戰深入不回殺僂既多
身卒死之三軍失聲萬士喪氣孰明公心君門萬里裹
革東歸遙遙江壖部曲候迎悲風旆纒民懷其忠士感
其義虎奮鷹揚如見其至卜廟得吉東望際海神來妥
之有永無壞狂夫辱國天子震怒立呼狂豎斬以大斧
狂罪則誅死事奈何褒封哀榮百世不磨豈惟不磨元

嗣御史既有兄弟又多孫子奕奕勲門秩秩良材天之
報忠豈有涯哉

栢堂詩

并序

崇仁劉觀母熊氏有貞節觀作堂奉之翰林
學士吳先生有記藝文監丞揭曼碩氏作頌
朝賢多繼之元統癸酉集歸自京師亦為之
賦焉

翼翼新堂深明高安嘉樹在庭維栢桓桓霜降露濡載

寒載溫歲以序遷我有恒歡維時壽母來居來言昔扶
弱支今撫其繁先君之思永矢弗捐視此庭堅不忘以
存肅肅令子敬共前聞婉婉有容郁郁有文宜其室家長
其子孫煖日扶輿涼風進軒駕言忘憂游息山園閣度
淳珍匪汎鬯芬樂時和豐具養無愆孰栖爾柏翹翹其
鸞里人瞻之孝慈之門君子有言德風攸敦敢告司藝
善培根原

題胡徵君器之和陶軒

春木晨榮秋華夕滋流雲行天逝者如斯柴車葛巾曷
能歸來我懷古人徒頌其詩有美君子尚友先覺靡觴
不吟無詠不屬豈無他人孰此追躅優哉游哉君子之
樂吾儕小人力絀乃休猶可以馳曷其停輶卷舒無悶
入聖實優敢以未成竊方前修祖德之述尚論其世我
獨何為夙墮羈紲聞君贊歌祇以生愧既曰知非請勗
餘歲

集讀書山中時草屋三間以紙糊其壁舍弟仲常

為書邵子諸詩于東謂之邵菴書陶詩于西謂之
陶菴吳先生見而嘆之以為世內無窮之悲世外
無窮之樂也

心遠堂詩

渺渺平湖其際維山飛鳥載雲晨往夕還平湖瀰瀰薄
于山止雲窮于飛目力無際慨昔周遊山川邈悠忽焉
興懷一息九州千古既往萬古方至悠悠我思譬彼逝
水樂哉君子其居深深不遯以寧式究厥心

題上官樵寓

青松為闕白雲為戶其迎無賓其住非主假夢得鹿遇
奕忘斧不去不留是曰樵寓

東坡戴履圖

謫居荒濱無誰與語言從諸黎歸在中途風雨適至借
具田父犍童怪隨傳像畫者笠以雨來履以泥行匪以
為容用適其情朝衣軒車固將若驚恒服爾假猶不予
寧含德之厚混迹于俗巍巍勲華天章轉燭幽囚野死

曾莫指目我不自忘的致凝矚偉哉天人其猶神龍其
來無迎其去誰從形擬猶差矧是飾容世無其人神交
或逢

洞賓像

洞庭無波明月萬里我時見之劒若秋水

王清道士魚障

春雷發聲風雨時至古石龍門一躍千里我服神丹得
為水仙鱗鱗媵予飛朝九天

墨蘭

遍遊楚澤枝訊葉辨使讀騷者得見真面好風東來其
葉紛披所不隨者懷芳自持厯沅跨湘無二無雜向一
毫端生分別法日莫無雲微風扇和樹之百畝寧愁其
多

畫魚

東人結網西人漑驚滄海長流吾獨何心

古詩五言

次韻答袁伯長學士十首

衡門有一士閉戶守玄一修之三十載深不願世述晶
光無淪降赫赫抱靈質終然不可掩煦物若春日
斗酒相勞苦聊樂不為怠蘊醢備百索嘉此歲無害馳
驅廢穡事每為同里慨縣官庶能念中歲得半代
春花好顏色持以勸君酒君今不識察後竟侶今不悲
歌無轉喉拙舞不運肘生不與世諧死寧同世朽
少年學為琴豈惜為君撫知音不在今在昔或可數遠

遊竟不值歸將託幽阻念子獨我求龍門作風雨

鷄鳴當知晨草茁當知春出山復懷歸永愧先幾人飛
蓬離本條縱浪隨風塵流水東入海逝者何趺趺

兩丘各宕堯荒墮下深迫狐狸號其顛儀秦此幽宅二
子昔在世往復相十百所以學仙人劇飲謝天厄

跼蹐鳴趙瑟揚眉鼓秦弦遠奔萬金室窈窕若雲烟安
知碧草晚飛光無復年聲名竟不立淪落世羞傳

疏傳出漢庭決去豈不偉未能忘懷樂日問金餘幾陶

生行乞食何有口腹累鄧郎臨死時不復著簪屣

少年頗濩落偃蹇無所承長大不得食常持一半冰昔
為井中泥今為井上瓴未得復故初灌輸効微能

梧桐失故蔭丹鳳蓄餘戀去之千仞端十載始來見高
秋竹無實忽忽恐復遠昆丘玉為田為子採芝箭

早起

馳騫亦已久淹留竟何成疇昔夢至家屋舍還敬傾晨
思理垣墉夕念鉏耨荆惟恐歲年莫惕然心為驚歸去

非有難納履斯邁征永言得安居庶無愧平生
時運忽在秋觸目非故先哀蟬厲短噪雜英綴微鮮昔
人知化育能事本無言翕然變時雍皞皞同其天斷琴
具斯意一鼓三絕絃寥寥竟何補戚戚徒自憐

夜坐

露坐廣庭夕海氣接清顥毛髮感森爽幽憂集中抱寄
身百年內變化不待老區區事形骸所競非所寶昧茲
動靜間生理誠草草聖言就湮沒迷散費深討所恨精

力微何以相斯道

溽暑多蚊蟲起滅尋尺內稍思出夷曠高眠釋煩憤凝
神一無為消息任往來怡然以終古熒熒自乘載消搖
日月上下視渺蘇塊如何在世間動輒為形碍得見王
子喬吾將解蒼佩

遊長春宮詩分韻得在字

神宮古城端千里見畿內幽闕挾北戶連嶂鎖西黛南
樹蕩何極東溟渺無碍中天積紫翠雲氣常飄颻孰云

萬有賸攬括固茲在奇懷得縱觀指顧生百慨天風正
浩蕩春物尚茫昧翻愁目力短奕奕飛鳥背永感神禹
迹願託穆王載仙人騎黃鵠一往不復徠忽然會予心
雲中贈雙珮

題張希孟凝雲石

海石不盈握隕然如委雲危岑集遠思虛竇棲微熏天
高泰華斷日出香爐分几硯龔清潤文章互綢繆潛雷
起神谷震驚天上聞亟視恐無及化為九龍文

題許愿夫抗雲樓

城居苦迫隘層闌上岌嶷措身方丈間千里心目超可
以抗浮雲誰能顧塵囂擬峴有古臺遺碑正蕭條子固
若星斗其魂安可招龐公輟耕際頗懷見凌霄賦詩托
飛鳥長空何寥寥

次韻袁伯長贈陶心山

憶昔白雲君高居保黃寧夕煉黃帝鼎晨注神農經羣
真時滿坐逸響每盈庭寸田既無畔幽闕那有局飛凌

萬物表婆娑垂帶鈴歸來塵世外曾孫宴虛亭所志在
高遠三峰列青冥頽然得所止一念三千齡崑崙安明
珠旭日曜帝青盤桓有童子松根求茯苓

送周東揚赴零陵分韻得鳥字

拂劍池水秋理棹湘江曉地古記載多時清徵發少雨
洗崖石文風作林谷官應上朝陽巖東望聽啼鳥

魏氏園亭分韻得池字

託好自故國傾懷得新知授館澗谷居張筵芙蓉池高

僧攝香至清唱入雲遲况陪兩時彥羣從俱忘疲仲夏
乃積雨水花各華滋高柳猶故物臨風復披披曾見百
年外飛蓋來參差隆替與時邁百室無一遺盛德獨能
遠感慨更共之西風白鶴表落日滄江湄二老昔並世
遺書方在茲勗哉保傳業子孫以相貽

喜雨分韻得須字

下車未逾月十日九馳驅祇知府事殷不聞燕寢娛傳
呼當夙興落月啼城烏中衢塵不動肅肅來車徒借問

何所往高堂集羣儒列坐多皓首魏冠講唐虞遂以青
衿升鼓篋何于于是時天氣高市童襍呼雩風雲東南
合倏然靈雨俱緩帶却煩劇清涼變斯須麗澤深有悅
羣生亦昭蘇逍遙池閣上何必欣戚殊

鄭同甫書帶草軒

六籍久將墜鄭君家多書韋編苦易絕掇拾收蟲魚幽
草長春雨參差在庭除紉結可束素垂之仍有餘焉知
廣文舍猶如不其居光風動交翠汗青羅綺䟽熠燿照

屋壁烟雲隨卷舒春夢不可長蟾輝墮簷虛故人舊題
字使我增欷歔

朱秀之杞菊軒

高軒何所植杞菊交根枝紫實既秋熟黃花亦晚滋嘉
名信共愛何以療予飢此邦號富庶士賈志懷資蕭條
山石間誰復見惇嫠遺脫蕪并餘椎剝無完肌縱彼百
畝受豈得安耘耔種此頃步內庶無征奪思採擷勿違
節亭茅貴有宜三咽可千歲逍遙奉天隨

某遊吳中因省墓山間頗見田塋有可念因贊高
軒之樂而及之庶觀風者之有采而知之者

柜軒詩

并序

吳郡故有金氏名章者仕宋為迪功郎家饒
于貲而好施予子孫相承以孝友著稱迄今
室居尚存五世孫在讀書飭行鄉里尤稱為
善人君子嘗手植柜樹于家其本初甚微未
幾益滋茂因構軒於旁名之曰柜軒某嘗登

是軒遂為賦詩以紀其事在字潤甫樂善其

自號云

東南有嘉樹蔭彼君子居君子秬侯裔積善慶有餘
俛仰二百年猶是舊室廬一朝種茲樹翫然向庭除
種來能幾何倏爾凌空虛亭亭結根據枝葉交扶踈
高軒構爽塏對此頻軒渠芳春膏雨沐炎夏薰風嘯
君子日夷猶澹然塵慮攄對客共談笑課兒事詩書
昭昭穹壤間此樂復何如竭來數十年此樹高于初
信知君子德歲

久同發舒願言繼封植勿共荊棘鋤庶幾魏公槐于今
復權輿

聽秋軒

為僧賦

道人攝袂深坐減盡定長松結層霄密竹生晝暝龍
吟崖石陰鳥度池月瑩秋從何處來觸塵成我聽振空
林外錫旋復室中磬耳門證三昧圓應普虛聲所懷丹
丘山春夢一擊醒等此聞性觀素壁寫三逕

玉壺堂詩

并序

積水之極蔚然中丘渾淪穹隆匡郭扶輿就之若虛履之若浮人不可到也而仙者居之以其園中而方外也謂之壺焉聞有何公真人有依綠之園蓋取諸水也又有玉壺之堂殆擬此與會稽鄙夫曰先天地生巍巍尊高旁有垣闕狀如蓬壺曲閣相通可以踟躕且玉者積陽至剛純粹之精取類恐符哉看雲叟曰是吾師也子為我賦之乃賦曰

真人德孔容治生尺宅間外質謝追琢中虛保堅完合
璧映華蓋懸珠隱泥九天地立有極日月循無端晨從
密霧入夕與飛景還足履五文絲首冠夫容丹行厨膳
琅膏燕坐以盤桓弟子看雲叟疇昔為我言往見不可
得期之三千年

送可無上人

五公昔講時聽者不起坐虛空悉銷殞何由見人我名
字誰與安說義話已墮尚自無亦無更問可不可不見

天雨華誰能拾餘朶

送南野真人

山中積雪盡江南春水多解劒還尚方朝衣挂松蘿城
門望羽節扁舟聞櫂歌故園良已適昔遊將奈何閒雲
棲古樹空談遺落花何如兩衰鬢相將照江波

次韻鄧善之遊山中

杖藜入南山却立賞奇秀所懷玉局翁來往絢履舊空
餘松在澗仍作琴筑奏徘徊龍井上雲氣起晴晝入門

避霑灑脫屐亂苔甃陽岡扣雲石陰房絕遺構澄公愛
客至取水極幽竇坐我簷蔔中餘香不聞嗅但見瓢中
清翠影落羣岫烹煎黃金芽不取穀雨後同來二三子
三咽不忍噉講堂集羣彥千鎰坐吟究浪浪襍飛雨沉
沉度清漏令我懷幼學胡為褰章綬

題王眉叟真人溪居對月圖

長松千尺起白石下磷磷隱居愜素念燕坐見閒身溪
流宛無異月色亦常新悠悠宇宙內佳亭名主人

題天台柯東谷

汎觀天台圖始識柯東谷
草樹何蒙茸循澗入深曲
升高雲繞身厲淺石嚙足
桃花一千樹隔竹映茅屋
中有學仙子黃庭晝常讀
俯聽下玄鶴遠至馴白鹿
疑是司馬君高繼陶生躅
臨海賓出日藝圃收種玉
除是太白來此句方可續

春山曉雲圖

置屋雲厓陰耕田雲洞表
積雨白霧收遠林翠波曉
農

人告春及扶杖驚窈窕久與塵事違冥鴻送孤矯

山居避暑圖

急雨山泉落長松激回風靈響從天來夜高旦彌雄龍
眠九州虛鶴起層霄空羽衣者誰子從我入雲中

秋江待渡圖

江潭秋木落臨流送將歸微風蕩去楫相近更遠違
客從一翁吹簫白雲飛我乃命黃鶴乘之待前磯

雪嶺盤車圖

玉闕積雪高十里百盤摺索馳便平閣望劍已愁絕時
平無從軍道遠可由竭惟應飛行仙萬仞俯瑯闕

雲屋圖

曾山出雲氣還自為文章木石共蒙被容華生老蒼朝
來既非跡夕往亦何藏道人宴坐次見之以為常了知
不可繪相對聊徜徉

羣鮮朝鯉圖

吾嘗觀剥象貫魚何翩翩其類實繁多咸仰宗厥顛金

鱗三十六其數陰已極用變乃純剥飛躍見天則於惟
君子升大小宜畢興雷風既動盪雷雨方騰蒸倦客年
五十讀易未知道觀物每興懷玩心以忘老爾時卧田
里所願得豐年欲占小人夢乃為畫者傳

謝吳宗師送芍藥名酒

講臣不常參寂寞奉朝請故人得好花持贈迺兼并金
盤日中出品目標禁省一萼重數銖夫與牡丹並釀香
實尊貴深婉更和靜居然荷慰藉相對空晝永起求神

農經錄在海涯境天天羨厥草曾不耀朱景上京素高
寒夏至冰在井沙草不滿寸苞葉成枯梗同生非異土
榮悴何不等此豈夫容丹逡巡太陽鼎灼灼天女嬪魏
魏步搖整盈盈綃卷膚况彼南國迥移置諒不可孤賞
且深領雖與名酒俱絕飲畏停冷頗聞好事者采蘋置
充茗刀圭果三咽五臟化戢頃文章麗出日儀鳳同煥
炳言誇衆應疑所貴仙者肯

次韻天台張秋原

張侯殊可人長著百斛酒吾來輒取醉未晏卧甕缶吾
意適君會斟酌愧勤厚清濁無所嫌但喜杯在手不負
頭上巾每懷陶五柳

寄青城道者

海上別妻子山中求茯苓白虎戲玄渚蒼龍護黃局燒
香招五老行厨庖天丁從子似非遠丹霞粲華星

十月十八日聽誦道書

崑崙極高大九巖觀其顛空洞蓄幽渺綢緼遂回旋真

情惚恍際純明徹幽玄倒影俯白日浮氣堆紫烟奇文
妙變化靈響合自然降神作賢聖理物成歲年古書二
三簡殘缺忘所傳中夜坐燒香微吟思至言身生堯舜
後意在羲皇前墮然泯知識經時雪垂肩

陳溪山先生留山齋春日賢郎來省具酒為樂

某賦此詩

齋居愧幽寂君子肯辱臨怡然推夙好曠懷明斷金席
間奉容止朝夕副所欽春陽汎物華時雨流泉深戶牖

啟宿莽新衣振塵襟諸子共來省森如羣玉林嘉蔬薦
甘旨芳酒逮朋簪伐木美嚶鳴鹿鳴歌野苓哀病晚聞
道力弱嗟弗任詩書實世業冠纓匪斯今顧望羞龍斷
汙潢溢蹄涔守約易循理足欲資陸沉仄聞太丘長率
物由平心敢因先覺言發予小人歲豈弟勗明德鳴鶴
方在陰

病起謝陳溪山及齋中諸友

良夜聽春雨清晨對晴昊沉疴適去體行庭寫幽抱鳴

禽在嘉樹方池接生草扶策流水濱灑濯悅澤好幼稚
勝犁鋤勤蓄慎相保歸還讀我書聖言事探討親朋一
時來藜藿薦行潦敬恭奉天明松喬不知老

送會稽宰進士夏仲善

會稽吾故鄉今喜得廉吏三仕彌固窮不愧親策士故
鄉伊可懷西去廿餘世清流遶修竹可想不可至知君
垂朱紱吟嘯了公事還能探禹穴莽蒼思古始太守文
字交僚佐足風致汎舟溪雪前列坐惠風次詩成可繕

寫千里以相寄

守白野達
無善也

送豫章熊太古兼寄蘇伯修參政

豫章有家學禮樂不見收為養不擇祿淒涼向炎州攬
結桂樹枝誰為玉雪謀十年一再見我老君白頭古劒
光陸離繫以珊瑚鉤激昂文史間未愧班馬儔蘇君天
下士定價琳琅球江漢方渺然為我觀素秋長吟以相
送明月在高樓

哀陳童子

南山有鳳雛飛來上林樹祇承朝陽輝不食秋夕露珠
零海氣淨壁毀月光曙巫陽不能招荔丹滿洲嶼

荅胡士恭二首

王母昔賜我一雙白玉環懷之四萬年恒在胸臆間偶
因朝木公識之為開顏忽然化黃鶴飲食崑崙山漢武
好神仙多欲心不閒所以至太液遂從白雲還

鵬運候風信龍起從雲飛神物本無待感類相因依高
人服金丹質化識者希引睇貫霄漢倏忽歷九圍駕言

清秋鶴同承太陽輝何期老鍛翮素心竟成違

書昔人出入西廣詩後

道路無險難征人多故傷窮愁一酌恩感舊忘他鄉九
疑不能從二妃在瀟湘無以寫憂思吹笙為鳳皇

宿紫極宮新樓

野人入城府且就雲房宿東瞻蘇翁亭南望孺子屋相
從總君子寒夜對明燭閱世如雲烟進道貴金玉取泉
總持井烹茶武夷曲踈梅折高枝蕭閒對晨旭欲寄高

軒人修眉遠山綠

秋江亭

白沙積高雪有文見川交
華星垂光彩沉壁依潛蛟
偉哉江海客結亭在其交
流波散席上絕岸當空坳
靈槎八月至垂綸向鯨鰲
清露集衣裳嘉魚薦壺匏
賓客醉白苧微颿激林梢

次韻陳溪山送搖扇

念我久坐雨貽詩遠來句
遙知治寸田隄防固嚴閨
憂

樂無嬰懷蕩蕩羲皇人自信知者希虛名非所親南薰
待披拂感此時物新無由奉言笑泥塗滯周輪長策豈
手容招遙遺閒身受經浮丘伯老矣弟子申何以荅佳
貺執御從後塵火傳思為薪烹魚溉河濱

贈喻仁本

早從中州遊希孟實豪傑穹隆如喬岳培塿謝魍魎侃
侃買燈疏英主動顏色賢子瘞黃壤感痛解朝玦朝遊
長白春暮踏厯亭月慨然得終身屢召不踐轍兵闕關

中飢特起救焚烈反袂傷道窮委頓成殞絕賦詩哭遺
直好事為鏤碣爾來二十年江海鬢如雪每興故人思
思道歎睽越忽逢喻先生江中倚舟楫久為濟南客山
川類能說共言中丞舊流水助嗚咽更出中丞書歲久
字不滅交誼貴久要於焉見高節問君將何之束書向
京國豈無同門士簪笏在周列觀人以其主論薦共持
揭敢為祿仕勤聊以誦明哲古人不可期長風起天末

夢舊遊諸友并序

三月三日午後隱几夢館閣諸舊遊存沒參
坐陳衆仲舉盃相向曰旅甚思公亦知公之
深思旅但不得見爾記得有詩六首其末句
云萬死起俄忽只是一思憶是孟浩然作為
是白居易予曰殆是孟詩但不記得感動而
覺是年夏聞陳亡

隱几暮春雨夢見舊知識瑰奇秦漢刻墨本在東壁論
辨如平時契闊增歎息就中東海生顏色殊不憚停杯

不成飲執手道疇昔苦言孟浩然有句在胸臆萬死起
俄忽只是一思憶

題金陵汪尉雲松巢畫卷

喬木多悲風卑枝安可居興懷有巢氏漠在遠古初浮
雲無定姿溶溶滿堂虛脫身往從之一起千仞餘冉冉
愁絕思悠悠隨卷舒白鶴千載來徘徊向匡廬乘蓋生
紫烟捨此將焉如惟有南昌尉凌風一回車

雲林圖

雲林之高風可望日出海君子居其間旦夕餐沆瀣三
年毛骨換九載神色改翩然升雲去鸞鳳翳五彩山中
有神藥服食多所採寄語學仙子佇立以相待

次韻二首

昔者采芳草青春在中林三秀不並世日莫生重陰霜
雪日已積萎穢日已深持獻雖無時豈忘事幽尋齋房
多受釐垂衣正思欽霏烟散熏澤靡艾非所任華英發
貞本靈占係同心錫貢華未晚庭實生南金

微根抱山石薪樵本同科曾不中構榱將置崇構阿終
焉荷聖恩早休遂婆娑霜雪之所餘茯苓表垂蘿時能
致佳士攜壺挂寒柯極目思遠道含情托清歌秋水不
盈勺白雲豈其多結枝待幽吹泠然送鳴珂

紀夢二首

夢見二三子被服皆古人雲漢盛履舄山河儼冠紳言

非世間辭靈

一作虛

音轉彌綸反思昔遺遠浩蕩不可陳

睡覺日在樹空榻凝餘塵

東南多名山衰病嗟遠道夢中躡虛空黃鶴為先導宮
林冠晨霞遠水澹秋昊似在松喬間未覺黃綺老飢渴
非所憂清露在幽草

足痛吟寄費無隱

足痛不履地匡坐畏長傲令人讀道書聊以釋幽抱修
身身不衰此事聞頗早涉世得憂患時至遂枯槁茅簷
苦聽雨更愁妨穫稻分當長飢吟稚子忽吾惱盈約固
不齊受命自玄造東家種薯芋健步常為討况聞東海

上旅生如瓜棗食之可不死所嗟在遠道親往未必能
駕言亦非好

歲寒吟

邑南有高山隱者浮丘伯弟子遠來求千載莫仙宅蒼
崖接天光旭日融五色永言托幽貞綿綿奉明德

南昌昔將隱吳市遂不還茲土獨遺迹丹氣留空山噓
潤被草木含滋及蛭黽相望世云遠雲中期妙顏

蕭蕭松間雨夜靜殊未止青鐙照殘書白髮隱塵几園

綺德不孤相持一瓢水如何在人境茅茨罕隣里

賦神蛙 并序

曹南吳生出神蛙相示玄石光潤其口目臂足儼然如生脊有文點腹若容受蓋真蛙也不知何自而化石焉有博物者能辨之

貞女望歸夫穹窿化山骨飛揚洞中燕遇雨帖石窟古時蟾蜍精千載得仙術噓吸服元氣綿眇值通息形體雖尚存性情已非昔誤食至陰精返此太玄魄無乃書

契初科斗抱殘墨猶與筆硯交君子同几格幽光感星
宿靈氣生倏忽慎爾韞匱藏勿使蛟龍得錫圭神禹時
因之問河伯

道園遺稿卷一

欽定四庫全書薈要卷一萬六千三百七十九

集部

道園遺稿卷二

元 虞集 撰

古詩七言

雪山圖為劉伯溫監憲賦

我家成都雪山東公家張掖雪山北吳船誰載鄭廣文
起寫崐崙半天白張掖雪融草木長禾生隴畝多牛羊
烽火連臺擬樓觀江海微茫秋練光著書東觀夜如水

太乙燃藜照圖史從遊冠帶文武備斐然四郡良家子
君不見黃河奔流百谷盈神禹疏鑿中州平極天鳥道
雲氣盡惟北有斗西長庚

天涯山歌為崢山公賦

大鹵之虛山有崢強晉名都古城郭太帝親征西極還
命總師干理鄞鄂三世專居二百年公孫御史籌帷幕
興言諫諍國體重抗論陵夷鄙夫忤九衢塵土迷白晝
萬里天風飛一鶚連山長城下平曠孤秀嶄巖自天落

安車夷猶奉王母咫尺天涯下磅礴振河載華坤軸穩
捫參厯井天梯鑿六合高牕竅空洞日月容光陰氣薄
春鬢翡翠擁烟霧秋水芙蓉淬鋒鏑東游漫愛華不注
西行不到秦關夢上方宮闕何所有回首穹窿起龍漠
天山舊音本雄渾孤鳳一鳴冠阿閣蒼茫石鼓難為聲
野水寒雲不堪酢奉祀曾過軒轅臺俯仰高深嘆今昨
汾波橫出衝黃流長感秋歌入寥廓卷石東南雖有聞
安得停車徧丘壑元姚自是一世豪若比公詩少揮霍

有詔無容極幽賞黃木扶胥求海若前茅度嶺建旌纛
後吹凌波襍簫籥馬飲清泉榕樹陰鴈隨飛雪梅花夢
退食委蛇幕府清明月懸空夜城柝橫槩高吟動鬼神
轉鈞妙手隨斟酌坐令刀劍化牛犢夾岸鯨鯢貫蛟鱷
閭風玄圃在天外玉振金聲為誰作雅歌緩帶有餘暇
直道高情無宿諾百粵皆知白水心羣魚莫恃黃金橐
國家將相真有人中外均勞正參錯請開雲漢分天章
歸理咸韶奏嘉樂老夫當與園綺徒仰聽鈞天佇耕穫

謝王員外贈古銅帶鈎劒琫歌

金銅帶鈎屈螭首綠玉沈沈世稀有古人佩劒之所遺
虛琫尚疑光射斗腰圍老去忘繫拘空服書紳重有餘
奇哉二物君子贈敢與礪燧同縈紆古者弦韋皆有托
視我斷金庶無忤循循偃蹇長在手神化翻愁入寥廓
劒能使我無邪心握之在本用在鐔利器行藏兩無有
一寸空間空古今他日東行尋禹穴何以酬之掇明月
白雲滿地歸去來不待傍人三奉珎

無住和尚命俞巖隱寫予陋質予蓋簪纓家子
其意亦蕭散因作山偈一首戲贈聊發佳公
一笑也

我欲自識面莫如鏡中真引鏡實有我卻鏡見無因俞
侯乃善幻作此意生身旁人總言似我亦愛其人但恐
年歲久不知是何人俞侯俞侯吾已老百事無能勿復
道幸自不曾虧損他莫將塵影瞞人好

金人出塞圖

此詩學古錄失傳翰
林珠玉已有脫句

海風吹沙如捲濤高為陲磧深為壕築壘其上嚴周遭
名王專居氣振豪肉食漣飲田為遨八月草白風颼颼
馬食草實輕骨毛加弦試弓復置橐今日不樂心慄慄
什什伍伍呼其曹銀黃兔鶻明繡袍鷓鴣小管隨鳴鞞
背孤向虛出北臯海東之鷲王不驕錦韝金鏃紅絨絛
按習久畜思一超是時晶清天翳絕駕鵝東來雲帖帖
去地萬仞天一瞥離婁屬望目力竭微如聞音鷲一掣
束身直上不迴折遂使孤飛一片雪頃刻平蕪灑毛血

爭誇得雋頓足悅掛兔懸狼何足說旌旗先歸向城闕
落日悲風起蕭屑烟塵滿城鼓微咽大酋要王具甘歆
王亦欣然沃焦熱闕支出迎騎小鐵琵琶兩姬紅顴頰
舞歌迭進醉燭滅穹廬斜轉艷觥月

九歌圖

太乙神君號東皇玉質要妙含和陽生生炁始通微茫
綿綿蒸空神中央浮英上羅文天章覆冒下湍谷與阡
旁塞無間靈無方靈來乘柔往乘剛湘君夫人鎮相望

清溫靜好非淫傷司命元老元氣昌手執藜杖色老蒼
厯劫壽命不可量少君之壽同其長離無異體合有常
出入萬化終不亡晶明發晨上搏桑海天赫赫真金芒
質鍊不減長垂光河源混混流湯湯伯也坐視無迎將
千古萬古何堂堂彼幽為厲為強梁朝狸莫豹方鴟張
精魂熠耀志意荒招之不反巫無良屈生作歌沈九湘
世人傳聲罕尋詳祝融仙子調玄黃九神出圖百怪藏
不信請視虞公章

送呂教授還臨川 并序

古者仕不出其國五十里百里而已入仕王
朝才千里而近無父兄妻子墳墓屋宅之別
而有祿食之羨車服之華焉豈不便適人情
乎哉今國家奄有宇宙仕者視南交朔易若
東西家然則彼出入驅馳不越乎州閭黨術
之間者不亦隘乎呂君仲謙世居臨川之南
山木鬱茂田毛易長仰事其親俯育其妻子

何嘗有意于遠遊哉一旦用薦書得為遼東
學官隨牒以行且萬里冬裘不足以禦寒疏
腸不勝其恒肉雖志氣不變然情能無少違
乎僕願留之館中而不可歸其宜矣故作詩
以送之

黃金作臺留好客好客不留秋月白東風吹雪滿衣襟
却賦長歌送行客

一作色

遼東之山盤巫閭六月五月雪

不除明朝遣使降香去五尺冰上行飛車

一作飛行車

知君

江上慣舟楫快馬如龍亦徒設東取來時一卷

一作書

還向江波對

一作弄

明月我本蜀人隨水來結屋與子相

隣隈白髮京塵不歸去臨風相送興

一作空

悠哉

三鳳行贈海東之下第南歸

海東之兄弟三人如鳳皇胸臆羽翮皆文章九年三入
天門翔伯沖天季驚人一日四海皆知名東之之文五
色雲見者眩晃生眇昏三進三已之了若耳不聞二人
得之喜未足云東之不愠乃可尊東書江上歸見親君

子之樂樂最真君不見匡廬之山峭崿而嵯峨左界乎
豫章諸川會為螽蟄其陰千源浩浩導岷經潛沱山氣
束鬱不得去上衝為紫蓋直與天相摩為雲覆八極為
雨漲九河海東之子能觀山以成德其進蓋未易量也
偶爾小詘奈爾何

戴和父歸越

戴先生日飲五斗醉不得再飲一石不肯眠昨從桃源
來兩袖携風烟長安市上小兒女拍手攔道呼神仙馬

如游龍花如雨蹴蹋春秋作朝暮東方不作牕間戲上

帝還令海邊去海邊玉虹夜不

一作何日

收貝宮珠闕皆蛟

虬芝田玉樹久相待天上老仙那許留戴先生鑑河之

水三千丈不可以鑑可以釀明朝亦脫錦袍去

一作歸

與

爾酣歌釣船上

題米友仁長江烟雨圖寄柯敬仲

米家自在江頭住愛向長江寫烟雨長江烟雨萬里餘
書畫扁舟在何處古人翰墨今罕存好事千金馬足論

憑君寄語丹丘子，盍買山田遺子孫。

吳中女子畫花鳥歌

皇元風雅
為人錯刊

吳中女兒顏色好，洗面看花花為俏。
調朱弄粉不自施，寫作花間雪衣鳥。
綠窻沈沈春晝遲，平生心事花鳥知。
花殘鳥去人不歸，細雨梅酸愁畫眉。

楊補之掀篷圖

十年騎馬燕山道，飛雪如花著烏帽。
清江不復泛扁舟，況見繁枝挿晴昊。
楊丞拈筆寫江村，滿卷荒寒共郊島。

君不見金盤玉

一作露

錦成團蝴蝶東家怨春早

王侍郎崆峒石

德符堂中有真石一握玄雲出靈碧飛潤應能作霖雨
含光自可裁圭璧天根萬古磨不磷窈窕中虛藏谷神
願得微言獻天子千二百歲勤修身

雪嶺馳車

七月八日山陰道積雪平沙沒烟草三日餐冰渡磧遙
重載索馳發車早當衡比比擁蒙茸玉庭傳令疾於風

却憐聚落在何國可以踏歌酣馬酮居庸關南百萬里
春雨草青平若砥向非羊馬便高寒所不懷歸如白水
題上都崇真宮辟繼復初參政韻

故人一去宿草寒而我幾度南屏山琳宮素壁見題字
輒墮清淚如洄灣文章百年世何有如以鈍掘鐫孱顏
瞥然有感亦易散奈此細讀多高閒沉思不見托魂夢
何異落月留梁間走為麒麟飛為鸞黃金作玦玉作環
重來豈無造化意我以白髮遲公還

城南春曉圖

天台先生有山癖卧起無山朝不食幾年騎馬聽朝雞
磊塊諸峰挂胸臆陳生受意不受辭竟拈秃筆為掃之
既安樓觀對奇石復著梁棧橫清漪遊吾舊遊釣吾釣
隔林彷彿聞幽鳥瓊臺何處無桃花此是城南暮春曉
夜來天子傳詔呼先生直上鑾坡趨盤盤迴復一萬里
無限好山并好水如從島上見陳生盡寫歸來畫堂裏

天台圖

天台一萬八千丈下視東海如一杯金鷄候鳴日欲出
吞吐瀕瀆如奔雷白雲瀾瀾散綿絮顛顛戴出三崔嵬
一一十十翠撐拄千千百百瑠樓臺王生染白作莽碧
回風御氣洪濤開古亭高卓盤石上橫舟自挿烟林隈
老楓古檜立岼側云可自此登天台尚無鷄犬識林落
況有車馬相喧阗我少學仙意疾得首如蓬雪俄毵
臨風每憶坐忘叟深愧失脚無由回尋常夢游如宿到
忽見畫本興予懷赤城仙人王志和爾家靈寶安在哉

人間夢斷何足許存想終日勞形骸庭間竹葉可舟楫
羽衣生雲歸去來

桃源圖

層巒複嶺何崔嵬流泉委注波無迴昔人尋源既解往
孰謂後世無能來徐生採藥渡瀛海生人之資悉滂沛
汎舟一去不復還自是秦皇親為載商於只在咸陽南
城中日日見晴嵐四翁採芝到頭白何人往問窮幽探
信知桃源隨地有自為狂馳不回首莫向神仙詰渺茫

且對新圖玩春晝軒轅鄉裏真固師果得修身身不衰
年穀順成物不疵玄黃衣裳從委垂

牧牛歌贈自牧上人

學人曾是牧牛兒細雨斜風總不知豐草長林情似水
懸崖絕壁命如絲不著境亦不離境繩杖隨身端息瞬
歷年辛苦一朝忘贏得半川烟月冷君不見大江東短
簑衣橫笛何曾別晚風大地山河等甘露嘉禾成熟萬
方同國泰民安歌頌起無言可贊牧人功老師兄善自

牧露地當年已純熟大千妙用一毫端不是寂空聊自足

澧州謝家通濟橋

澧有蘭兮沅有芷相望涓涓隔秋水蛟龍迴夜隱波深
虹霓垂晨駕空起千年石尉何西東天下有道津梁通
朝桐東皇蒼雲中行人無忘懷謝公

豐州李氏孝義詩

沙中枸杞已成樹的礫丹珠飽秋露蒲萄滿堂間鍾乳

上堂饌食有肥羜壯者已老少者壯蜂房各自開牖戶
此是豐州孝義門莫忘河南李家譜

龍興黃堂隆道宮西華太姆元君飛茆詩

并序

空同子竇君神清與予賦詩于天寶宮予有
句曰一瓢春水煮仙茆神清曰噫子安得及
此我昔遊黃堂見石曼卿記不載飛茆始末
願與同志者詠而傳之久不暇也神人將啟
子而誘其衷乎不然胡為而及此也予應之

曰彼夫容洞中穠麗主者宜不察苦之味也
非予孰當賦之乃為之吟云

昔日飛茆渡江水一息秋風五十里憑虛結根土長苗
萬古黃堂咀甘美潔清至淨服食仙不忍獨令身不死
折瓊載卜知吉亨連茹包之獻天子

郎官湖李白祠

并序

南交黎侯景高歸朝三十餘年自至元中被
命驅馳軍旅勞効顯著後賜田江漢之上以

居暇日作安南志若干卷示不忘父母之邦
間嘗即郎官湖上修太白祠皇慶初元來朝
大夫士多為侯賦詩

郎官湖邊太白祠百年毀壞誰顧之
黎侯自是南海客寂寞湖上看明月
間闕歸國故時心馬上鬢毛今是雪
春來幾見湖水清春去還看湖水碧
今人蕭條古人遠黎侯此時淚沾臆
臨湖作屋祠太白一日祠成人歎息
千年太白豈復存惟有長庚射西極
光芒彷彿雲委蛇

黎侯起舞天為泣鯨魚上天終不返黎侯惆悵坐成晚
君不來兮那可期黎侯之心湖水知湖水波浪湖樹葉
風來總是迎送辭

金馬圖

人負金馬
睡於馬上

賈胡自騎千金馬解囊小憇荒城下平原無樹起秋風
夢到陰山雪橫野太平疆宇大無外外戶連城無閑夜
不然安有獨行人懷寶安眠如畫者

王晉卿畫赤壁圖

黃州江上霜月白蘇子泛舟携二客虬龍虎豹木石間
玉宇瓊樓歸未得主家遺玳瑁珊瑚鈎丹青一幅千金酬
惆悵圖窮見黃鶴白雲千載空悠悠

趙子昂畫馬圖

憶昔從公侍書殿天閑過目如飛電池邊儘有吮毫人
神駿誰能誇獨擅公今騎鯨隘九州人間空復看驂騑
惟應馭氣可相逐黃竹雪深千萬秋

柯丹丘畫松竹二首

丹丘寫松臨石湖一樹偃蹇一樹枯長年偃蹇色深黛
枯者鐵石能相待令人最憶寒山子曾見松生此山裏
時來石上自閒吟解聽天風半空起

江心石上起烟霧隨意琅玕寫無數就中欲覓釣魚竿
濯足滄浪歲年莫君不見白髮天台鄭廣文前身畫師
今更聞請看翡翠三株樹猶是蓬萊五色雲

陳容畫十四龍

所翁所畫十四龍雲海慘淡數尺中毫端欲極龍變化

信使情狀無一同意冥鬼神造竒迹藝謝狗馬矜精工
徐生家藏隱溪上氣與古劍相爭雄春雨來時屋壁潤
白晝坐對塵埃空持之示我為嘆息安得真見如陳公
蓋聞龍乃至陽精無有嗜欲來羈籠昔年高士隱弗見
矯矯哀世追冥鴻千載神明守龍澤如見潛德遺空濛
澤雲出水作溪碧綿綿子孫環為宮石林幽洞難相識
獨倚桃竹懷高風

孫康映雪圖

千巖萬壑明積雪老樹長蘿掛孤月下有老生眠破廬
穴隙窺書癡凍鶻何如出門歷瓊田翻身夜入通明天
手把瑤筴招飛仙人間畫裏那能傳

墨竹歌

南風吹雪盡成竹北園老人寫羣玉枯梢不逐蛟龍化
密葉終堪鳳鸞宿數枝東出好弟兄楚楚劒佩微聞聲
兩枝又如父携子老者偃蹇稚者榮我昔西游洋州驛
破綠燒梗具朝食摧殘僅同蓬與麻太守清貧那復得

羅山甘竹笋乃佳移根便欲從山家雲風春嶺即持去
為我更作風枝斜

金源野人獻麋圖

紫蓋貴人何處來西風搖落郊原開澤虞獲鮮敢私取
下馬持獻披榛菜韞弓服矢遽為拜止轡受之貌間暇
千里獨行日云暮熊耶羆耶在林野君不見吁嗟麟兮
人不知卒然遇之慎爾為

送人游廬山

我愛江上之廬山山止不動江不還紫雲冠嶺危石古

白鷗衝雨春波間浩然始見潯陽浦太白欲托雲松間

河嶽蕭條二子死神靈恍惚千年慳昔我尋春入幽竹

有人抱甕開深關遂從鳥道陟高險一窺虎跡聽潺湲

似聞餘磬開石壁恐是入化非人衆霜崖石櫃成異物

銀釵負薪多老鬢嗟我老病難再往羨子較轡無留艱

攬衣步出石頭渡解衣竟到星子灣沉吟三月煙花碧

眺望千里楓林殷猿驚鶴怨酬好語水流花開怡妙顏

束帶他年事朝請躡屐安得窮躋攀行矣此日不再得
空山落日騎黃斑

題虎屏

高堂白日靜如水屏間於菟伏將起登車何用卜熊貌
鑄鼎徒聞走螭魅耿耿仁威謝爪距蔚蔚文章著深美
君不見旌旗不動九關間海晏塵清千萬里

陳容畫龍

陳容生閩嶠之東骨氣生硬如老龍每拈秃筆掃風雨

自寫其真非畫工曾為吾家作雙劍采石波濤天下險
巴山昨夜春雨來素壁高垂戶長掩

題劉仲明鳴鳳朝陽操

鳳凰昔來何所緣堯舜聖明臯夔賢一鳴不再三千年
孤生懸崖命由天鬱繞霄漢纏雲烟虞淵浴日紅滿川
海波洶洶不盤旋聲與律呂互相宣非度弱水遊神仙
此製不省人間傳

題劉光遠琴泉詩卷後

長沙老人種桐梓手斲為琴度宮徵彈得流泉石上聲
只有巢由能洗耳當時誰與制此名前朝丞相賢公子
黃金不成白髮短聊以高情付山水公子飛仙老人在
目送歸鴻秋萬里老人有子前為壽願翁千歲長如此
已將朱袖拂雲和更釀清泉設重几

玄潭觀劍歌

新年風雨晝多晦解纜東辭白沙外玄潭觀中有古劍
倚棹求觀鬼神會陰崖中斷如截肪玄水泓渟受前隘

欲令開匣猶未敢惟恐雷霆走光怪至神不殺跡已空
藏器幽深欲何待孤蓬歸坐燈影微客為高歌聊一快
鄰舟借具知有無擬掣寒蛟斫春鱸

書昔人出入西廣詩後

戈船將軍昔南下樓櫓衝波當車馬臨流橫槊昔為誰
遷客騷人能賦者桂林近時蠻獠息營帳酬功頗優暇
伏波銅柱高嵯峨路險難分莫相嚇

送程楚公子叔賓官海上

世皇任使無南北楚公薦賢動江國當年臺閣多門生
富有文華在賓客世家貴游少者佳祕書奉禮差可階
青衫莞庫東海上極目天津思汎槎豫章得君豈忘舊
引之清波一援手鶯花三月玉堂深共啟黃封賜來酒

送胡士則

胡君著書昔同館長日據床運犀管功臣遺事動如山
小小聲名何足算明光殿裏初進書紫衫束帶帽正烏
君王歡喜侍臣賀殿下風暄花萼舒是時親賜蒲萄酒

潑艷玉杯先入手承恩歸去各西東共歎文明古希有
胡君名冠三十人傳詔與官顏色新寧辭闕下向田里
得祿斗升緣為親頗聞山寺近官舍吟步長廊莫騎馬
瀛洲學士如堵墻新折琅玕待君寫

寄謝楊友直太守送桃竹杖

梓潼使君今南雄江心紫玉寄野翁扶持恐是蛟龍化
騰躍似與猿猱同十年乞身不待老鄉人飲酒歌年豐
君不見太乙之精在天上青藜滿地如蒿蓬

寄薛玄卿

故人贈我漢時鏡，殘質剝蝕遺空明。
開奩照見白鬚髮，似是採芝商嶺生。
憶昔交遊盡冥邈，耿耿銀河曉星落。
惟有瓊臺瀟灑人，長嘯西風滿寥廓。

題表姪陳可立青山白雲圖

昔時謝傅卧東山，亦未忘情絲竹間。
微風動塵車盖合，白苧作衣團扇閒。
風流一去如秋草，我思古人令人老。
茂林修竹何處多，雨洗青山青更好。

溪山圖

曉日朱方得玄鶴一直衝風上寥廓橫翔八表覽九州
下視山川間城郭清溪縈繞千萬尋金銀宮闕檜森森
商山紫雲何處好惟覺蕭臺秋氣深

畫龍

所翁畫龍妙當世神思已遠誰能繼陳家復見海珠君
也向毫端分久似越滕一幅瑩且完噓雲駕雨凌春湍
不知何歲因轟掣破卷飛上青雲端

射虎歌

州人布矢之蒿蓬半夜射殺南山雄捲皮帶雪送官府
割肉大嚼千夫同前日東家牛盡啗犬豕無遺人落膽
不知世有李將軍擊鼓報神聲坎坎

刷馬歌

天馬之來大宛國漢帝心馳渥洼域貳師兵甲費如山
毛骨權奇不多得世祖開基肇太平昔日大宛俱拱北
如雲之馬西北來飛控驚塵遍南陌豢養年深生息蕃

即今詔刷無遺迹青絲絡頭千萬輩戢戢駢頭死槽枥

一程瘡毒一程愁比到燕山肥者瘠吾觀天庖十二閑

五花成隊春斑斑監官喂養盛芻豆年年騎去居庸關

聖朝誰信多盜賊却慮騎氣藏凶奸駕駘盡從天上去

驂騑豈得留人間漢人南人窘徒步道路相從俱厚顏

我今已是倦遊者東家蹇驢何必借布襪青鞵取次行

正喜不遭官長罵鄉里健兒弓弩手詔許征鞍常穩跨

嶺南烽火亂者誰何事至今猶梗化君不見漢文皇帝

承平時千里之馬將安之又不見項王一騎烏江渡到頭不識陰陵路

按弓圖

朔風蕭蕭沙草枯避暑南還八月初貴人退食坐平蕪
白日皎皎寒雲除左擎蒼鷹右韓盧手調繁弱矢滿壺
馬驕不受轡勒拘奚奴前執奔塵趨小者伏兔大於菟
上馬一擊將無餘養勇大發神氣舒徒御遠合獲不虛
首獻上殺當氍毹連車載橐來徐徐大庖賜宴日未晡

蕭蕭笳鼓環周廬天子萬壽臣歡娛我昔扈從行兩都
每欲賦此嗟才踈江村父老相携扶數尺茅簷看畫圖
題游弘道所藏劉伯熙畫

燕城建都將百年喬木往往遼金前宮中屏帳愛奇古
每托畫手馳風烟房山絕筆商山老內府人家跡如掃
畫苑今惟劉伯熙白髮承恩最偏好西山古寺劫火餘
斧斤所赦遺殘枯久經霜雪如鐵石膏沐雨露還扶踈
一夕書帷侍清宴有詔令熙寫畿縣徧圖形勝到巖壑

直幹交柯每盈卷游侯緣從自當時閣下庭前屢見之
朝衣佐守南海上袖卷龍髯雷雨垂高堂風動海水立
江岳驚奔鬼神泣禁直岩嶢翠蓋高誰識行蹤露華濕
徂徠新甫何足攀巴丘正似青城山人聞彈指千百歲
大夫與我俱蒼顏

汪華玉所藏李息齋古木竹石圖

帝城佛刹西南曲數仞高堂十尋木亦有幽篁春笋生
顛倒橫斜亂寒玉空庭月落蛟龍舞阿閣雲間孔鸞宿

大德年中最熙洽四海無虞年穀熟聖人護念如慈雲
粉金寫經五千軸吳興先生承詔起精藝東南遂空谷
橫窓曲几擅清雅寶氣龍香散芬郁我時布衣初到京
隨客來觀嗟不足棲遲至大到延祐墜緒遺經蒙見錄
聖明天子心廣大仁孝東宮協淵穆金殿朝回即薦賢
鳴鳳高梧麗晨旭白頭寺主愛文學游龍流水來相續
黃鸝遶樹鳩喚雨晴絲入戶階眠鹿中書右府尚多暇
况復西清澹春服薊丘李公年甚高親書簞簞試拈禿

南風堂上住多日好聽晨鐘赴僧粥枯梢長葉風雨來
老可黃華俱眷屬揮毫相軋李河東共悼房山渺江陸
曹南老商亦有名拂素先傾酒千斛蜀人仲淵不會畫
側帽長吟動華屋蹇予冷撰從諸公兀然坐隅若鴻鵠
風雲月露不計時聚散悲歡歲年促汪侯何處得此圖
其長丈餘高尺六松檜蒼茫轉樹腰鐵石嵯峨偃山腹
昔人不見今人老空憶臨風對森矗後來把筆誰最能
閣下丹丘嘆幽獨令渠見此會傷神况我茅簷揩病目

文章精彩寧復還天上華星光煜煜

題寫生手卷贈李道山赴九江茶官

春叢何窅窕翠竹題幽鳥秋實結甘酸溪鳧倚暮寒後
日歲復歲盛年不留老將至湖上新亭早晚成可以供
釣可以問耕看花食實老孫子擊鼓撞鐘歌太平一官
黃蘆苦竹間琵琶船外月團團故人寫生一歲事恐有
離愁不足惜匡廬山好秋色歸持濃黛作修眉窓下連
卷數峰碧

趙伯高所藏楊補之松竹梅圖

卉木何情同歲寒君子合并嗟獨難
冰霜滿地風景異清修古節來毫端
南渡衣冠憶初合萑葦蕪葭揔蕭颯
長生玉立古顏貌欲選疎英變殘臘
西都昔者畫功臣良工健筆隨風塵
尺書黃髮共來往誰見留侯如婦人
江上幽人有真跡俯仰興亡寫今昔
丘園偃蹇非不多獨想高懷淚沾臆

鍾生清露軒

江西諸侯好賓客彈鋏歸來無愧色學舍如舟安足居
白髮秋風岼高幘鏗爾舍瑟還讀書上天繁露垂庭除
河清有頌芝有曲為我長歌傾玉壺

與族姪孫從善

白頭喜見族諸孫青門為世夫何言成都桑柘日已廢
儘有遺書堪討論風花寒食江上路墟墓興哀慚一餐
憐爾篤實可進學竭力孝敬思生存

律詩五言

出小東郭

問訊成都宅還過萬里橋鄰牆皂角樹官路綠楊條
曲都無在茅茨忽見邀滄江沾白雪盡為夢魂銷

望巴山

巴嶺對秋屏依稀泰華形雙尖天際碧一色雨餘青
牙蠹穿行柏旌幢接降靈南昌漢時尉招與步空庭

次韻葉賓月山居十首

冰泮溪流碧雲生島嶼紅輕陰殘夢裏遠樹亂愁中鷗

外無晴絮鶯邊共晚風地偏山氣近霏靄濕房櫳

落日亭前水翻風雨後荷翠簾明薄醉羽扇按清歌影

淨鷗千頃涼生

一作深

蟻一柯扁舟成獨詠詩思尚能多

露冷天光逼溪澄夜影圓水花含窈窕山吹縱清綿為
覓洪崖侶重尋赤壁船翻愁孤鶴外迴互萬山連

歲晚水生壑山深雪擁肩清齋須杞菊甘餌足參苓水
繞階除靜杉依石室青白雲麾不去畫影舞虛櫺

綠鎖依松潤絳簾亂蘚斑吹笙花下散飛燕雨中還有

客歸謀酒無言卧看山春禽忽相喚深樹兩闌闌
綺疏收易卷紫盃罷分茶日暖聊行草風微好看花行
寓君子宅懸榻故人家遠勝騎官馬聽雞趁早衙

霜林收碩果雨檻卧幽芳留客山原枕分題玉井床衣
裘凝薄冷戶牖宿殘香未覺成都遠風流獨草堂

隱几風簷竹詩成酒病酥楓屯雲錦陣梅折海濤圖翠
袖開筵出華簪折簡呼移舟趣相就玉鱠斫生鱸

簡冊驚前夢文章赴後期賞花時命駕愛竹屢題詩小

草顛尤勝深杯醉不辭交游傾四海風雨夜吹簷
風日宜芳歲烟霞樂燕居坐深閒看奕燭冷靜修書臘
醞紅生玉春盤綠間蔬但須門有客不問食無魚

名酒

名酒不可得幽花誰送來秋霜垂鬢髮夕照在樓臺盡
日山公醉何年庾信回喚人吹玉笛移席坐蒼苔

無疑先生不遠千里訪某于寂寞之濱曾未旬
日賦詩留別雖無以欸未忍從也次韻且致

繾綣之私四首

無疑先生
南劍人

養親無復日不忍愛遺生一客獨高義千山致遠情烹
魚供漑釜秣馬趣歸程從此延津路應將問耦耕

酷暑秋仍熾幽花晚自香誰將百年意共付一窓涼事
業青燈舊心期白髮長山林儘迂濶江海正蒼茫

望氣秋橫劍分光夜續鐙寒梅不鬪雪春水盡融冰座
與賢人對門從稚子鷹鄉祠應合樂豪傑若為興

薦書慚不用空復意憐才共逐雙鳬去誰飛一鶚催鳴

彞文字在几杖見聞來明詔求遺逸蒲輪孰可陪

題平遠趙公像

將相先生舊江湖早退翁丹砂留劍客琴韻答天工
喬木荒烟合幽蘭宿雨同羅浮與衡岳猶想遇冥鴻

題疎齋盧公像

持節江湖外吟詩魏晉間長庚垂野迴病鶴倚秋間
玉局謀堪奕金鑒遂不還春來無宿草點點涿州山

次吳宗師韻題朱本初藏秀樓

世傳垂紱裔蚤作采真遊引月池邊樹呼雲鶴外樓河
圖留信史洛頌載歸舟無限吟詩興西山對九秋

和龔子敬竹亭詩

萬竹尚書宅高亭表素襟扶持自遠大臨眺極高深風
露兼秋色梧桐共晚陰惟應有棲鳳餘韻寄瑤琴

次韻馬伯庸少監四首

仍歲從巡幸山川識重臨講帷來濟濟馳道止駸駸五
月衣裘薄諸生坐席深歸耕何待老莫問二疏金

移蹕宮城曙烟花繞閣重來王俱屬籍稱使不傳烽賜
席還清問囊書更手封恐煩宣室召視日轉蒼龍

臣甫多愁思長歌拜杜鵑鑿岷通閣道積水放樓船惆
悵霜橫野栖遲雪滿顛經行看宿草碧色自年年

太平知永日漸老惜芳晨論說慚孤學推揚負相臣退
思常感慨拜賜每逡巡郊藪多間地餘生託鳳麟

題趙繼清詩稿

禮樂三千字才名二十春綠樽清坐客朱紱苦吟身海

日香浮樹淮雲暖向人同年多要地早晚接朝紳

題草亭

春雨夜鳴屋曉來青草生煖薰初舞蝶香近更啼鶯裁
剪成書帶褰紉結佩瓊自非邵處士休放小車行

奉別阿魯威東泉學士遊甌越

憶昔同經幄春明下玉除掛冠俄去國連舸總盛書筍
脯嘗紅稻尊羹斫白魚莫言江海遠咫尺玉堂廬

寄白雲間公講師

古寺白雲間鐘聲竹樹間唐詩留屋壁蜀道憶鄉關橘
袖霜前送袈裟雨裏還重逢三十載刻石玉遮山

書趙節度建炎誥勅後

義旅趨京國危城藉宿勲山從官位改世以故家聞誥
勅遺先代圖經補闕文淒涼寶劍贈元自岳將軍

讀王伯儀參政中山周氏賑粟詩感慨遂賦

不作三年畜聊謀一日安素封能自富紅腐幸相完東
里難為惠春陵謾永嘆信知麟趾意秩秩寓周官

次韻劉伯溫送王止善員外四首

并序

某今春與止善員外約三月致仕同遊武夷
既而聞其扁舟江上遂不及與之別監憲學
齋公送以七言律詩一章五言三章遠蒙錄
寄不勝慨然蓋公之所賦所以激清風于古
道發大雅于儒林止善平生遂有見于久遠
所係亦大矣輒次韻四篇追寄止善亦以頌
公之盛德拙陋不工錄呈愧悚一笑幸甚

故人歸去甚清華公有新詩在小車天外秋聲先鴈陣
雲邊清夢過蜂衙未尋舊宅山陰竹更憶玄都觀裏花
擬叙別懷題紙尾目昏書字愧欹斜

公門無俗客相識已經年歸有廉車送人知國士賢詩
隨官事少身與盛名全省署居清切何曾種秫田

衣冠懷故老翰墨送初筵老有詩囊在家從室磬懸豈
知清剡興不賦武夷篇千仞西山雪高情獨爾賢

携書山寺讀深夜接猿吟秋水銀河影春雲錦瑟音尊

前思北海世外愧南金禹穴堪尋否涼風起夕陰

題黃思謙所藏雪窓蘭二首

澧浦多芳草微風翠葉長墨雲開劍戟香澤近衣裳書帶垂青簡璵璠委玉肪同心誰可並芝本產齋房

手攬華鬢結化為樓閣雲幽人移近坐天女散餘芬九畹春光動三湘曉色分凌波送羅襪誰是鳳毛羣

送董生赴仙居尉

黑髮仙居尉登高解賦詩海邊迎日觀花底詠風漪臺

府多仙友詩書即吏師勤廉須自力慰我故人思

寄段惟德憲副

持斧雙溪上寒梅照髻華臨風懷鳳閣見雪憶龍沙夜
訪山陰竹晨餐海上瓜自嗟留滯久欲繼使君車

酬崔御史送熊掌

熊掌來東國分甘到老夫鷹刀寒斷節翠釜煖柔膚兔
脫中山醢魚藏丙穴腴藜腸渾未厭玉食恐時須

題金平章所藏竹石圖

江水兼天碧簫簫滿谷生靜和春雨重動挾晚風清投
策看龍躍裁笙學鳳鳴千年倚磐石君子表幽貞

周彥文野泉圖

舊邑成新隱山泉喜發蒙涵容常不溢挹注詎能窮
豹飾山光潤龍眠石氣通還應化春雨為澤豈言功

遠法師圖像

地淨緣心淨空真即性真白華無垢足金色化生身
幽鳥時時現山花日日新願同陶處士相見過溪頻

虎溪三笑圖

入社心無適過橋迹邁存自嗟機事失空與畫圖論白
羽秋風靜黃花夕露煩詎能隨衆笑我亦付無言

贈堯公開講鄱陽

法席初鳴鼓龍天已滿空花飛檐外雨磬動室中風寶
氣來天上金聲振楚東點頭無數石應是禮生公

用唐綦母著作韻送間白雲長老還吳

凌空一錫歸幾日到禪扉花交珠樹網苔長石人衣秋

水依空淨浮雲映日微白雲無所住此際亦歸飛

寄吳宗師

花發上陽紅官袍醉晚風題詩酬怨鶴寫信寄飛鴻
闔闔天光上蓬萊海氣中松聲一兩疊時寄看雲翁

朱元暉山水

耆舊襄陽遠新詩問水濱苔磯垂釣久竹院訪僧頻
書畫晴虹夜衣冠怪石春由來多健筆俱不寫紅塵

雙駿圖

真駿不受羈衝風忽競馳雪翻兩足練塵引一編絲國
士不並世神龍難力追故應雙劍氣昨夜起天池

步雪圖

白雪深無際蒼松近有關謝公穿屐去陶令荷鋤還鶴
舞千瓊樹猿吟萬玉山若非有仙骨誰得此清閒

踏雪圖

送遠水橋滑山高雪徑深乾坤無異色林壑有幽尋玉
樹連雲起風泉落澗沉斷流無剡棹何以識山陰

題黃太史書老將行

因觀老將行壯氣酒邊生健筆凌雲起長歌帶雨鳴藏
鵝歸浦迴塵鶴入江清最憶青神應寒泉不世情

周德尚見訪

烏帽吟時側黃花對處閒詩成風雨外劒動斗牛間畫
寂鶯啼樹春深竹滿山欣然聞好句多病愧柴關

城山閣

最愛臨山郡城中自有山雲邊開翠牖日上擁青鬢酌

酒為親壽擎書待子還仙翁重相許可以樂高閒

輓胡伯恭令尹三首

孔明雖少食安石自高情九藥黃鸝曉煎茶綠樹清
劣能勝束帶俄復寫懸旌絲竹東門道淒涼忍重行

厯厯言為教湛湛職有思誰能迎刃解真若治絲為
閱世佳公子持平老吏師詔書詢守令空復薦章馳

昔喜文書簡人知縣道真府君初在殯巷哭欲連村
競渡哀魚鱉安居念犬豚小民猶識此遺愛豈空言

題劉昇卿崇軒

名園當郡右峻嶺視山陰
鐘鼓清時迴鶯花列屋深
臨池春洗馬對雪夜鳴琴
監石多王謝高軒每共尋

覺非軒

今日非昨日始覺昨日非
龍光揮利刃鼠穴絕餘機
德業收新効身心發妙輝
空言成自誑何日聖賢歸

題南禪寺壁

南禪寺北峰林影動秋空
畫意聲塵表吟情水觀中
幽

叢收墜露老穉下微風不有維摩詰誰能丈室同

送長老住山

持衣入祖寺彈指寶樓開白日交蛛網青山入鏡臺散
花天女下行雨海龍回應是翻經罷諸天送供來

送憲史武子宣

建鄴多名勝前朝自汲來車書逢盛日簪紱見英才撒
棘秋闈散拈花畫殿開修能兼積孝令譽稱烏臺

贈簡天碧畫士

千仞青山裏和衣坐石苔看雲為雨去聽水共風來春
盡揚雄老秋清宋玉哀故園誰賦得空對畫圖開

重贈

雲氣連山動松聲夾雨寒抱琴穿竹逕留棹倚江湍夕
照歸神女春陰帶錦官此生舊同里偏解寫潺湲

新作暖閣望陳溪山不至

白雪滿虛空春生一粟中明窓塵帖帖圓鼎氣濛濛梅
萼猶緘綠椒花欲獻紅誰能共來往惟有太丘翁

正月十一夜坐

春雷晝初發夜雨遂沈沈
晚得隱居趣靜知生物心
佛燈依坐近神鼓隔林深
老病都無睡詩成聊自吟

暮春溪上作示涂振鐸

久向山中住間來上釣舟
携將青竹杖撐過白蘋洲
稚子休相覓衰翁更少留
東風吹雨起移繫屋西頭

用趙堦韻示次子延年

治生先務本為學必成章
念爾應門早無能韞匱藏
詩

書家世重師友歲年長尚念鳴幽鶴輕毛戒晏翔

天藻亭辟下生二笋示幼子翁歸二首

舍下生春笋兼旬丈尺高為開鴛瓦脊放出鳳池毛覆
屋通雲氣衝樓樹節旄連年雙碧玉聊寄一揮毫

墓田雙瑞竹遠報謝鄉僧江上歸無日山中見未曾簡
材生屋壁玉氣近書鐙茅舍秋風捲衝霄喜有朋

到寺

到寺無僧住鄰翁立暮雲喜逢新過客為說故將軍野

水寒先涸殘鐘暝不聞欲知何代建然竹讀碑文

夕照

夕照散餘曛氤氲見物羣斗杓垂野迴空影界河分會
弁懷瞻洛樓船憶祀汾荒村間草木隨地有浮雲

移柴門次韻薛玄卿

老寄池邊舍新移竹外門高人知獨樂妙語往相存衣
食隨年歲文章付子孫惟求綺園輩白髮共清尊

荅易小雅送商陸根

商陸經年覓春深幸見分斲同黃獨雪坐對白花雲參
木資芳澤芝蘭競宿熏道家空作脯寧與筍蔬羣

織錦迴文詩

宛轉千蠶緒綢繆一寸心文章遺彷彿情識墮幽沉春
日闌睢意秋風蟋蟀音文園空解賦終愧白頭吟

題畫馬

房家千里馬寫出渡江時烟霧連城起風雲六月馳尚
方催進馭勇士不能騎首宿成秋草空寒太液池

贈上清高士吳霞所

祕殿辭嚴直匡廬
覓重遊喜逢飛珮客
同上釣魚舟
圖畫龍鱗濕衣裳
鶴羽修松聲過溪
好為寫素絃秋

題春塘謝公程文

科第因時重人材
致力專文園尋舊稿
魯辟護殘編青紫
空遺恨蟲魚更別箋
運隨麟狩盡宴託鹿
鳴先獨斷繇今聖
賓興放昔傳詎聞深
美意並世一陳前

次韻蕙畝遊何氏莊

至治初

闕

憶芬蓮昔

有乘

闕

次韻貢仲章題城南書隱

闕

題秋山圖

峰迥留深隱天清襲素袍棲身斷人蹟遊目送鴻毛樹
挂栖厓鷺藤懸飲子猿龍眠石澗冷虎撼樹根牢木客
吟時共山樵奕處遭浮雲過水盡孤日挾霜高羽使來
三島胎僊舞九臯左招玉斧飲右攬赤松邀空色收寥

廓虛聲起繹騷彈琴遺古散載酒棹輕舸遂向圖中見
誰能世外逃乘槎幾月至一泛九秋濤


哭熊昶之

居官常獨處論事每平心獄用春秋斷囊無暮夜金家
園聊伏臘江路足登臨名酒應常得幽人亦重尋築堤
行冉冉修社坐深深環堵書連竹空林月照琴四年嗟
契濶千載入沉吟陶令餘瓶粟黔生正斂衾孤兒承薄
祿苦節奉遺音白髮秋多感青山夕已陰敦廉猶可望

虛偽庶能箴郡乘誰傳信來車失所欽



道園遺稿卷二



總校官庶吉士臣張能照
校對官檢討臣蕭九成
謄錄監生臣劉天倉